


Txirrindularitza

Zulatu erabakigarria

Aitor Garmendiak irabazi zuen Ordiziako Sari Nagusia

Aitor Garmendia txirrindulari itsasondoarrak irabazi zuen atzo arratsaldean jokatu-tako Ordiziako Sari Nagusia, modu honetara Neil Stephens taldekidearen erreleboa hartuz. ONCEkoak Arsenio Gonzalezekin batera ihes egin zuen Bidanian, eta bilbotarrak Mandubia jaisten izandako zulatua aprobeztatuz, bakarrik helmugaratu zen.



Bidaniara bidean aurreneko maldak igotzen, tropelari aurre hartuta.

ANDER GILLIEN

Pello Aiestaran / Donostia

ILUNPEAN eta erauntsi izugarriarekin amaitu zuten txirrindulariek Ordiziako Sari Nagusia. Ia ibilbide osoan eguraldiak nahiko ondo eutsi bazuen ere (Bidania jaisten bakarrik egin zuen euri pixka bat), azken 20 kilometroetan beldurtzeko moduko baldintzetan aritu behar izan zuten txirrindulari guztiak. Kasualtatez 5:30etan amaitu zen, baina helmugan sartu ahal izateko, Aitor Garmendiak eta bere atzetik etorri zirenek kotxeen argien laguntza ere behar izan zuten. Ez da harritzekoa proba hasi zuten guztiak helmuga baino lehen bizikletatik jaitea erabaki izana. Egoera horretan, egin zezaketen onena zen.

Ordiziako Sari Nagusiak urteroko eskema berari eutsi zion: irteeran Tourretik etorritakoak ziren faborito, eta karrera Bidanian gora erabakiko zen. Eta horrela gertatu zen azkenean. Hasieran eraso asko izan ziren, aurretik kilometro asko eta ibilbide gogorra geratzen ziren arren. Baina faboritoak adi egon ziren, eta selekzioa egiten joan zenean, beraiek hortxe egon ziren. Larraitz hirugarrenez igo zutenean (probako laugarren mendatea), 18 gizonen osatutako multzo bat geratu zen karreraren buruan. Horien artean, besteak beste, Prudencio Indurain, Santi Blanco, Gonzalez Arrieta, Aitor Garmendia, Iñigo Chaurreau, Aitor Osa, Lopez Uriarte, Arsenio Gonzalez, Armand De las Cuevas...

Ordiziatik pasatu ondoren, Chann McRae (Santa Clara) eta

Txente Garcia (Banesto) joan ziren aurretik, eta Bidaniako mendatearen hasierara minutuko aldearekin ailegatu ziren. Atzean borroka hasi zenean, ordea, bertan behera geratu zen bi hauen ahalegina. Arsenio Gonzalez izan zen erritmoa bizitu zuena eta selekzioa egin zuena: Aitor Garmendiak bakarrik jarraitu ahal izan zuen bere gupila. Atzean Banestoko Santi Blanco eta Prudencio Indurain eta Kelmeko Quintino Rodrigues sailatu ziren biek bat egiten, baina ezin. Arsenio Gonzalezek oso indartsu egin zuen Bidaniako igoera guztia (Aitor Garmendiak ez zion erreleborik ere eman), eta goian atzekoekiko alde 40 segundora joan zen. Kilometroak aurrera joan ahala, alde gehiago handitu zen: Azpeitian 1.08, Mandubia hasterakoan 1.50... eta goian 2.06.

Ordurako, bien artetik esprintean hobekien zein moldatzen zen erabakitzen ari ziren zaletuak, Ordiziara elkarrekin ailegatuko zirela nahiko garbi baitzegoen. Baina, ezustean, Mandubiako jaitziera erabakigarria gertatuko zen. Eta ez irristakorra eta arriskutsua zegoela-

ko. Arsenio Gonzalezek zulatua izan zuelako baizik. Mapeikoak gupila aldatu egin behar izan zuen, eta Aitor Garmendiak 20 segundo baliotsuko errenta lortu zuen. Gero, hortik helmugara bitartean jazarpen proba egin zuten biek. Arsenio Gonzalezek barruan zuen guztia eman zuen, baina ONCEkoak oso ondo eutsi zuen, eta azkenean Ordizian eskuak altxatzeko gai izan zen. Ilunpean, kotxeen argiez baliaturik. Baina garaipena, azken finean.

Modu honetara, Mapeik bigarren aldiz jarraian burua markatu behar izan zuen ONCEren aurrean. Iaz, Stephens-ek Della Santari irabazi zion esprintean. Atzo, Garmendiak Arseniori irabazi zion. Itsasondoarra oso pozik ageri zen helmugan. Bere hitzetan, karrera urduria izan zen, hasieratik erasoak izan zirelako. «Banestok eta Mapeik talde sendoak zituzten, eta beldur pixka bat ere banuen. Gero, ordea, aurrean sartu naiz eta lasaigo joan naiz». Arseniok Bidanian erasotzean, arazoak izan omen zituen jarraitzeko. «Erritmo aldatuta horretan kostata jarraitu diot, baina gero hobeto moldatu naiz». Mapeikoaren zulatua «zorte txarra» izan zela dio Aitor Garmendiak. «Azken kilometroak oso politak gertatu dira, biok hor borrokan ibili garelako». Azkenik, etxetik hain hurbil irabaztea zerbait berezia dela adierazi zuen itsasondoarrak. «Garaipen hau berezia da, nire etxea hemen ondoan dagoelako. Tourretik etorrita beste txispa bat izaten da, eta hori aprobeztatu dut». X

sailkapena

1. Aitor Garmendia (ONCE) 4.20.10
2. Arsenio Gonzalez (Mapei) 3.16ra
3. Prudencio Indurain (Banesto) 3.16ra
4. Santi Blanco (Banesto) 3.27ra
5. Quintino Rodriguez (Kelm) 4.20ra
6. Lilien Lebreton (Festina) 8.02ra
7. Juan Arenas (Festina) d.b.
8. Miguel Angel Peña (Mapei) d.b.
9. Aitor Osa (Euskadi) d.b.
10. Victor Gamito (Mx Onda) d.b.

Futbola



Ilusionatuta agertu ziren Eibarko jokalariek eta teknikoak atzo aurkezpenean.

J. AGIRRE

Zazpi aurpegi berriekin aurkeztu zen atzo Eibar

■ Ez da baztertu fitxaketa gehiago izatea

Erredakzioa / Donostia

EIBAR futbol taldeak atzo aurkeztu zuen 1996-97 denboraldirako taldea Ipuruako futbol zelaian. Eibartarrek egin dituzte jada lehen entrenamenduak, uztailaren 18an hasi baitziren entrenatzen. Denboraldi berriari ekiteko 21 gizon dauzka bere aginduetara Periko Alonso entrenatzaileak. Horietatik zazpi berriak dira: Arce eta Solaun Sestaotik etorri direnak, Juanjo Logroñesetik etorritakoa, Aitor Arregi Alavesetik eta Huguin, Jose Felix Guerrero eta Edu Alonso Athleticek utzitakoak. Bajak ere zazpi izan dira: Garitano, Ipintza, Jandro, Xabier, Aldalur, Carmona eta Goio.

Juan Luis Mardaras taldeko lehendakariak atzoko aurkezpenean esan zuenez, Eibarko

zuzendaritza oso gustura dago taldera ekarri dituzten jokalar berriekin. Ez zuen baztertu ondorengo egunetan fitxaketa gehiago egotea. Taldearen helburuei begira, «hasieran mailari eustea izango da gure helburua, baina ahal den sailkapen onena lortzera jo behar dugu», esan zuen Mardaresek. Jardunaldi bat lasai pasatzeko eskatu zien jokalariei, alegia, azken jardunaldirako jaitziera arriskuetatik kanpo egoteko.

Hauek dira Eibarko 21 jokalariek: Yubero eta Garmendia atezainak; Martinez, Sarriegi, Aitor Arregi, Arce, Aginaga, Sarasua eta Guerrero atzelariak; Bixente, Artetxe, Arregi, Olano, Kortina, Arriola, Solaun, Edu Alonso eta Arenaza; Huguin, Loinaz eta Juanjo aurretikariak. X

JUAN CARLOS RUIZ



Juan Gomez Donostian

Juan Gomez jokalar argentinarra atzo arratsaldean heldu zen Donostiara. Gaur goizean mediku azterketa egingo zaio eta, mediku azterketa ondo pasatzen badu, arratsaldeko 17:00etan aurkeztuko dute jokalar berria. Gomezek 25 urte dauzka, orain arte River Plate taldean jokatu du eta zentral moduan edo pibote gisa joka dezake. Realarekin jarraituz, Purk Sturm Graz talde austriarrari utzi dio Realak.